

Dadah Durjana Pemusnah Bangsa

Janganlah leka pemuda pemuda,
Harus waspada setiap masa,
Bagi membina wawasan bangsa,
Berbagai rupa serta bentuknya,
Heroin, candu, syabu dan sebagainya,
Walau apa jua panggilan namanya,
Tetap membawa bahaya petaka,
Jangan kita mudah percaya,
Ketagihkannya membawa sengsara,
Dadah yang hina jangan dicuba,
Kelak hidup akan merana,
Melentur biarlah waktu rebunganya,
Menanam bibit citarasa,
Menghayati seni sosial budaya,
Setiap ribut sosial dalam keluarga,
Perlu ditangani dengan bijaksana,
Ketagihan dadah bisa merosakkan,
Kesejahteraan kita sekeluarga,
Masyarakat dan bangsa negara,
Marilah bersama perang dadah,
Membantu Negara capai sasaran,
Kita bangkit dengan kejayaan,
Wawasan Negara kita buktikan,
Malaysia berjaya dengan kecemerlangan.

DADAH DURJANA

Dadah
Tika dulu kau bagai penawar
Mengukir sejarah di bidang perubatan
Penyelamat nyawa tika kesakitan

Namun kini
Martabatmu begitu hina
Hadirmu bak najis semata
Kau hanyalah pemusnah
Generasi dunia

Dadah
Kau umpama racun yang mengalir
Dalam pembuluh darah
Bagai jarum yang ditusuk hingga ke tulang
Perit..
Pedih..

Dadah
Kau durjana
Hadirmu membawa derita
Khayalan sementara cuma
Imaginasi dusta di bumi nyata
Membawa kesedihan
Mengundang derita sengsara
Dan mengusung
Kematian..

DADAH PEROSAK BANGSA

*tik..tik..tik
waktu terus berdetik
ragam manusia satu
demi satu tercipta*

*kulihat
dua manusia
berkongsi pentas yang sama
tapi
lakonan watak berbeza*

*satu
jalannya gah rapi sekali
berkot hitam mendabik dada
aduh (bangga)
persis telah
diukir diwajahnya
'aku lepasan pusat pengajian tinggi'
'aku manusia berkerjaya'*

*tapi yang di sana pula
aduh (sedih)
mengapa langkah kau susun
longlai tak bermaya
tubuhmu mengapa
dibaluti kain perca
aduh (marah) jijik aku melihatnya
noda-noda merah wajahmu
meyakinkanku
kau penagih dadah
bangkai bernyawa tak berguna
kau bukan lepasan
pusat pengajian tinggi
tapi lepasan pusat serenti*

*terkesima aku seketika
air mata yang
mengalir lesu di wajahnya
menyedarkan aku kembali
siapalah aku ini
untuk menilai manusia?
sekadar dari zahirnya?*

*aduh... (sedih)
pasti kau bergelumang derita
menjadi mangsa hiv*

*menelan peritnya rasa
cerca-cerca manusia
sendiri tanpa kasih keluarga
mimpi indahmu untuk
menggapai cita di jiwa
hanyalah mimpi selamanya*

*semuanya angkara kau
dadah durjana tak berguna
perosak bangsa perosak negara!*

*duhai rakanku sekalian
ayuh kalian buka mata
seluas lautan dunia
mahukah kalian merintih
aduh (sesal)
atau tersenyum aduh (gembira)
sepanjang masa kehidupan
yang kita ada
diri sendiri penentu segalanya
salam satu dunia
bahagia tanpa dadah!*

ANTI DADAH

Dadah Durjana !
Kau pemusnah bangsa negara,
mengheret jiwa ke lembah derita,
mengheret jasad ke jurang sengsara

Dadah Durjana !
Begitu ramai jenteramu
Dari Morphine ke Metaphetamine
Semuanya pendusta ! Helah Belaka !
Kau heret anak bangsaku ke dalam lumpur
dunia

Dadah Durjana !
Lihatlah jeratmu terkena
Jantung berdegup tapi rupanya mati di
mata,
tubuh masih bernyawa namun minda
dimamah mimpi yang nyata

Dadah Durjana !
Inilah kerjamu !
Apa dunia di matamu ?
Apa bangsa di hatimu ?
Wira sungguh dirimu
Hingga ramai penganut ajaranmu
Ku pohon, Ku rayu
Pindahkan anak bangsaku
Dari lumpur ke tanah
dari gelap ke nur dunia

Dadah Durjana !
Hentikan tawamu
Ini bukan seloka
Ini bukan halwa gigimu dadah
Mereka jatuh
mereka hanyut
mereka sesat
Dek indahnya Rupa Luaranmu
Tapi busuknya hatimu
Cukuplah hingga disitu